

## UVODNA RIJEČ UREDNIKA

Ovaj broj našeg i vašeg časopisa Udruženja sudija/sudaca u Federaciji BiH, „Pravo i pravda“ koje je vjeran pratilac svih „neumskih“ savjetovanja iz oblasti krivičnog prava, uobičajeno i ovaj put publikuje referate koji će biti prezentirani na ovogodišnjem skupu. Savjetovanje se organizuje pod radnim nazivom „Deset godina primjene krivičnog zakonodavstva u Bosni i Hercegovini“. Organizacioni odbor Savjetovanja je smatrao i pritom dobio široku podršku pravnika koji se bave materijom krivičnog prava, da je upravo sada pravi momenat kada bi trebali da se osvrnemo i procijenimo efekte primjene reformiranog i bitno izmijenjenog krivičnog zakonodavstva kod nas. Ovo je jedinstvena prilika da jedan veliki krug pravnika iz pravosuđa i ostalih koji se bave razvojem pravne misli u našoj zemlji uzme posrednu, ali aktivnu ulogu u provedu evaulacije dostignuća ili pak, nedorečenosti ili neadekvatnosti pojedinih krivičnopravnih rješenja. Očekujemo, kao i uvijek, vaše ideje, razmišljanja, prijedloge i to ne samo u okviru diskusija nego i u pismenom obliku. Podržavamo vas da na ovu važnu temu dostavite uredništvu časopisa vaša razmišljanja i prijedloge, koje bi u formi članka mogli objaviti u našem narednom broju.

„Pravo i pravda“ je zamišljen upravo kao časopis, koji, osim funkcije zbornika radova sa godišnjih savjetovanja za krivično pravo, treba i može biti mjesto gdje ćemo upravo mi, sudije, tužioci, advokati i drugi, dati doprinos jačanju društva zasnovanog na pravu i pravdi, na način da publikujemo ideje, prijedloge, kritike u odnosu na pravnu materiju uopšte. Stoga vas ponovo i uvijek pozivamo da tokom cijele godine, kontinuirano, šaljete vaše priloge da bi ih objavili, bez preinaka i /ili dorada. Ovaj poziv se odnosi ne samo na one koji se bave krivičnim pravom i srodnim pravnim disciplinama. Naprotiv, časopis Udruženja sudija/ sudaca u Federaciji BiH, otvoren je za sve one koji se bave pitanjem vladavine ustavnosti i zakonitosti, najposlije, vladavinom prava u najširem smislu te riječi. Stoga i ovaj broj, osim referata sa ovogodišnje savjetovanja, sadrži i nekoliko radova i članka autora koji se bave različitim, za nas i naše društvo u cjelini, relevantnim temama.

Važno je napomenuti da objavljeni radovi nisu podlijegali recenziji niti preinakama ili lektorisanju, izuzev nužnih tehničkih. Ove godine smo, da bi ujednačili i izbalansirali broj, sačinili bliža tehnička uputstva za objavu radova, sa kojima se možete upoznati pozivom na označene kontakte. Ovaj pristup svakako podrazumijeva i da autori sami lično snose punu odgovornost za izrečenu i publikovanu javnu riječ. Uredništvo časopisa i organizacioni odbor Savjetovanja u tom pravcu ne snose nikakvu odgovornost. Uvažavajući upravo profil naših autora i čitalaca ove stručne publikacije, smatramo da je ovakav demokratski princip primjeren nama, kao časopisu Udruženja sudija, namijenjenom upravo profesionalnoj odgovornoj publici.

Uredništvo napominje da osim teškoća koje neminovno sa sobom nose tranzicijske promjene u našem društvu u najširem smislu te riječi, procesi demokratizacije društva mogu se shvatiti i kao izazov svakom od nas da aktivnijim i glasnijim učešćem u pravosudnom životu, pa i objavljivanjem stručnih radova i tekstova, utičemo i kreiramo društvo u kojem će do punog izražaja doći jačanje tri temeljna principa svakog savremenog društva: demokratija, ljudska prava i slobode i vladavina prava.

Reprezentativan spisak ovogodišnjih autora i izlagača, kako domaćih tako i gostiju, odabrane teme i prezentacije, i Vi sami, poštovani učesnici savjetovanja i čitaoci, izvjesno doprinosite ostvarivanju ovih ciljeva. Stoga smo uvjereni da će i ovaj primjerak časopisa i naše tradicionalno savjetovanje biti i ovaj put zanimljivo i uspješno kako ste nas i do sada, uz sve opravdane i dobrodošle kritike, ocjenjivali.

Glavni i odgovorni urednik/ca

Aleksandra Martinović